

CHRIST ÑKUKURE ITIAT-IDAK-ISQÑ

1Ñwed Corinth 3: 1-23

QYQHỌ UKPEP-ÑKPỌ 390

Eke Mkparawa

IKỌ IBUOT: “Baba owo kiet ikemeke ndinim itiat-ukot-ufọk efen mbe se ema ekenim, emi edide Jesus Christ” (1Ñwed Corinth 3:11)

Ana Nte Enyene Eti Itiat-Ukot-Ufọk

Kpukpru ufọk eke ọsọñode ada odoro ke ọkpọsọñ itiat-ukot ufọk. Ufọk ekpeye nte eyeye, edieke ebọpde enye ke una-isọñ mme ke enyọñ utatan, edi ibat ibat owo ekeme ndiyom enye. Ọkpọsọñ oyobio ye edim ekeme ndinam enye esihede onyũ asiaha ndien, ndusuk,ọduọ. Ke ntre akpa ñkpọ ke edibọp ufọk edi eti itiat-ukot-ufọk.

Ndusuk ini enim eti itiat-ukot-ufọk; edi nte mme isua ebede, ñkpọ otibe emi abiatde enye. Ndusuk ema eda nti eto emi edobide enyũ esọñde idem ekem edori; edi ufiak mme ñkakat ebiat mmọ tutu mmọ ewure ke esisit ini. Ufọk oro, ñko, ekeme ndiduọ. Mbio ntiñ-enyin ese itiat-ukot-ufọk mmọ ke ini ke ini ndikut nte ke kpukpru ọfọn.

Itiat-Ukot-Ufọk Nditọ Abasi

Ke ini owo akabarede edi ata eyen Abasi, enye amana obufa, Jesus eyedi itiat-ukot ufọk esie ke mbuotidem. Baba ñkpọ kiet ikemeke ndibiat itiat-ukot-ufọk oro. Ema ebehem iso “edomo”, enye onyũ owut Idem Esie nte “ọsọñ-urua itiat inuk”. Ini kiet ke Isaiah eketiñde abaña edidi Jesus, enye ama ọdọhọ ete, “Mmọdo ntem ke Ọbọñ Jehovah ọdọhọ, ete, Sese, ami mmonim itiat ke Zion, itiat eke edomode, ọsọñ-urua itiat inuk, emi etimde esin ke idak ibibene” (Isaiah 28:16). Oro edi itiat-ukot-ufọk mbuotidem nnyin edieke nnyinidide mme Anditiene-Christ emi imanade obufa. Adaña ini nte nnyin idude ke itiat-ukot-ufọk oro, nnyin imoduk idibe. Baba ñkpọ kiet idinamke ufọk nnyin ọduọ.

Ndibọp Ndori Ke Itiat-Ukot-Ufọk

Ke esiode ndidori ke eti itiat-ukot-ufọk efep, nnyin inyene ndibọp edieke nnyin iyomde ndinyene ufọk. Ikureke ke ndibọp erinyaña ukpọñ. Ndusuk nnyin imekeme ndida akpa enọ mfọn nnyin ndomo ye isọñ ufọk. Baba owo kiet iyomke ndiduñ ke ufọk emi mminyeneke mme ibibene mme ọkọm. Ikureke ke isọñ. Isọñ ufọk ekpeye nte eyeye, edieke midorike ọkọm ke enyọñ, edi eyak enim enọ edim ye eyo, enye eyebiara.

Nnyin ke ibọbọp ke kpukpru se inamde ke kpukpru usen uwem nnyin.

“Kpukpru se afo etiñde,

kpukpru se afo anamde,

Edi ndibọp nnọ nsinsi ini”.

Anditiene-Christ oyom ndidu uwem eke enemde Abasi esit. Enye inamke utom iyom utip, edi Abasi ke ewewet onim, eyenyũ ekpe mme anam akpanikọ utip. “Sededi eke mbufo enamde, enam ke ofuri esit, nte ñkpọ eke enamde enọ Ọbọñ, minamke inọ owo; sia mbufo efiokde ete iyebọ Ọbọñ udeme nte utip mbufo. Mbufo enam utom enọ Christ Ọbọñ” (Ñwed Mbon Collosae 3:23, 24).

Ndika Iso Ke Ndibọp

Mme owo eke enimde ke akpanikọ ete ke mme imọ idu ke erinyaña kpukpru ini sia ema ekenyaña ukpọñ mme imọ ini kiet ko, enyene ata idiok ufọk. Uwem owo Abasi edi ufọk eke ekade iso ndibọp man enye ọfọn akan, enyũ eka iso edioñ se ema ekebọp.

Afo omokut ndiye ufọk emi ekebọpde ini kiet emi owo misehe enyin ke ediwak isua. Mmọ inyeneke uyai aba. Ndom emi ekeyetde ama akpa mmọñ; mme ñkpri usuñ ofum (window) ekeme ndibufo: esañ ukwak mmọñ ebomo: mme ñwed emi ediande ke ibibene edehe enyũ ewaha. Baba owo kiet iyomke ndiduñ ke oruk ebiet eke etiede ntem. Owo emi ekerede ete ke imọ iyesuk idu ke erinyaña imọ, sia ema ekenyaña imọ, ke imọ inamde ñkpọ ndidiọñ uwem owo Abasi imọ ọfọn me ke nditre ndinam, etie ntre.

Nsek Nditọ Ke Christ

Ufọk Abasi ke Corinth ema etoñọ ndibọp ndori ke Christ ata itiat-ukot-ufọk, edi mmọ ikọbọpke ikosim ke enyọñ itiat-ukot-ufọk mmọ. Paul ama ọdọhọ ete ke mmọ ekesuk edi nsek nditọ ke Christ, ekenyũ enyene ndibọk mmọ ke mmọñ eba idighe udia.

Owo-mbet oro etiñonọ nnyin ete ke mbuñwum spirit edi: “Ima, ye idaresit, ye emem, ye ime, ye mfon-ido, ye eti ido, ye erinam akpaniko, ye ifure-ifure ido, ye mfara ke idem” (Nwedi Mbon Galatia 5:22, 23). Owo Abasi emi enyenede erikan onyũ okponde enyene mfon emi, okpon akan ñkpri nditọ ke Christ. Edieke mbuñwom emi odude owo Abasi ke idem, Enye idinyeneke utọk ye eñwan ye ubahare emi Paul eketiñde abaña nte okodude ke otu nditọ Corinth.

Nwedi Abasi etiñ onọ nnyin abaña mme mfon emi Abasi oyomde nnyin ida isin ke ufok nnyin. “Edian eti ido ke mbuotidem mbufo, enyũ edian ifiok ke eti ido, enyũ edian erifara ke idem ke ifiok, ye ime ke erifara ke idem, ye utene Abasi ke ime ye ima ke uteñe Abasi, ye ima ke iman” (2Nwedi Peter 1:5-7). Iman ọworo ndinam ufon nno mbio efen. John Wesley ama ọdoro ini kiet ete;

**“Nam kpukpru ufon nte ekemede,
Ke adaña nte afo ekemede,
Ke kpukpru usuñ nte ekemede,
Ke kpukpru ebiet nte ekemede,
Ke kpukpru ini nte ekemede,
No kpukpru mmọ eke ekemede,
Ke adaña ini nte ekemede,”**

Ndidi Anditiene-Christ oyom nnyin inam utom. Ana nte nnyin iyom erinam asana, man ewubede udon idiok-ñkpọ ke esit nnyin efep. Jesus oyom mmọ eke esuhorede idem enam ñkpọ enọ Enye. Enye ama ọdoro ete: “Ofon onọ mmọ eke ebunede ke spirit: koro Obio Ubon Heaven enyene mmọ. ...ofon onọ mmọ eke enyenede ifure-ifure ido: Koro mmọ eyeda ison enyene” (Matthew 5:3, 5).

Nsuhore Idem

Ke editim ntiñ nsuhore idem ọworo nditre ndikere mbaña idem nnyin. Ndusuk owo edomo eti-eti ndisuhore idem, tutu ebure mbure ebaña nsuhore idem mmọ. Owo kiet ama etiñ ete ke “ndisuhore idem edi esit ndidu ke ndop uyo kpukpru ini. Enye edi nditre ndikere ñkpọ ekededi, nnyeneke mkpa idem mbaña se ededi eke enamde mi, se ededi eke enamde mi ifinake mi. Edi nditie ke emem ke ini owo mmitoroke mi, ye ke ini esuade enọ mi enyũ esinde mi ke ndek. Edi edinyene ebiet iduñ eke ediñde ke esit idem mmi emi ekemede ndiduk ke ufok nnyũ mberi usuñ nnyũ ntoño edon nno Ete ke ndibe, nnyũ ndu ke emem nte akwa inyañ eke odobode ke ini kpukpru se ikande mi ekuk edide mfina-mfina” (Nwedi Apostolic Faith Oyoro 17).

Jesus ekedi uwut-ñkpọ oruk nsuhore-idem oro. “Christ ke Idem Esie ama okut ndutuhọ kabaña mbufo, ete, mbufo ekpetiene esañake nde ikpat Imọ. Enye ikanamke idiok-ñkpọ, akanam inyũ ikwe Enye abiaña ke inua. Ke ini owo osuñide Enye, Enye isuñike mmọ usiene; ke ini Enye ebode ke ndutuhọ, Enye itinke ikọ ndige; edi ayak ikọ Esie esin ke ubok andikpe ndinen ikpe” (1 Peter 2:21-23).

Jesus ọkoro ete: “Mbufo efon ema ndien, kpa nte Ete mbufo ke Heaven ofonde ama” (Matthew 5:48). Ekem enye ofon nta onọ item ete, “Ikọ eke ñketiñde kpa ikọ oro edibiere ikpe onọ enye ke akpatre usen” (John 12:48); ke nte nnyin idinyeneke mfaña ke ini idide ke ikpe. Jesus ama onọ nnyin item Esie ke abaña nte nnyin ikpedide nditọ Abasi emi inyenede erikan, Enye onyũ oyom nnyin ibop idori ke ata Itiat-ukot-ufok man nnyin ikpekeme ndisim idaha mmọ. Ke ema ekenam nnyin isana, nnyin ikori ke mfon.

Ndikpono Abasi, Idighe Owo

Ndusuk mbon Corinth ema ema obok eron kiet ekan enye eken. Ndusuk mmọ ekebo erinyaña ukpon eto ke ukworo-ikọ Paul, ke ini ndusuk eken ekebo ke ini Apollos ekenyenede saña-saña mbono ye mmọ. Nte ededi, mmọ ema ema owo emi ekepepe mmọ abaña nte ebode erinyaña ukpon. Edi Paul ama añwana ndiwut mmọ ete ke imọ ye Apollos ikedi usuñ eke Abasi ekebede etiñ ikọ onọ mmọ. Edi Abasi ikpon-ikpon emi ekemede ndinam utom oro edi ñkpọ.

Edomo Utom Nnyin

Nte nnyin idi mme obop ufok otọ kiet, ke akpa itie, ufok nnyin kiet-kiet ndien ufok Abasi, Obio Ubon Esie ke ison. Eyedomo mme ufok nnyin, man ese se idade ibop mmọ. Nte mmọ etiede ke ñkañ añwa-añwa, ikemke nte edade oro etoro mmọ, “Utom kpukpru owo kiet-kiet eyeyarare; koro usen oro eyewut enye, koro usen oro edisierede ke ikañ; ikañ eyenyũ odomo se kpukpru owo ekenamde owut oruk utom eke edide” (1Nwedi Corinth 3:13).

Nsio-nsio nkpo edu eke edade ebop. Obukpok, nnyanyaña ye mbio edi se isakde ikañ eti-eti. Owo ekeme ndida mme nkpo emi mbop ufok usop-usop, edi idibighike. Onyũ edieke ikañ obuberede, eyeta mmọ ini kiet.

Sidibe (Silver), eme (gold) ye mme osõn-urua itiat eken edi se ikañ mmikemeke ndita. Idighe se esopde ekut enyũ eda mmọ enam nkpri nkpo. Edi mmọ eyebighi. Nnyin imekeme ndibop Ufok eke nkañ Spirit ke nkpo eke edibighide, edieke nnyin ibopde itiene item eke Abasi onode. Nnyin inyene ndidu uwem ke ntiñ enyin inyũ ise ke ini ke ini mme nnyin isuk idu ke itiat-ukot-ufok oro, emi edide Christ Jesus. Edieke nnyin inamde utom ino Abasi, ye ke ubon Esie ikpon, nnyin iyebọ utip. Edi nnyin ikpananam utom Abasi nte inanam, edieke nnyin inamde man itie nte ndinen ke enyin owo, utom nnyin edi obukpok, nnyanyaña me mbio, eyenyũ ata ikañ.

Temple Edisana Spirit

“Nte mbufo ifiokke ite mme imo idi temple Abasi, Spirit Abasi onyũ oduñ mme imo ke esit?” (1Nwed Corinth 3:16). Nnyin idighe eke nnyin. Nte ikot Abasi, ema edep nnyin kensõn-urua Iyip Jesus ke ini efakde nnyin; ema enyũ eyet esit nnyin asana ke Iyip Jesus ke erinam asana ima inyũ ikabade idi ebiet iduñ Edisana Spirit ke ibode Baptism Edisana Spirit. Ndien nnyin imenyene ufok eke ebopde ekure; edi nnyin imenyene ndika iso mbana enye kpukpru usen man eye, inyũ inyene ndikpeme kpukpru usen nte isañade ke iso Abasi ye ke iso owo man ika iso ndidiñ ufok oro.

MME MBUME

1. Nso ke Paul okokot mbon Corinth? Nso idi ntak?
2. Anie edi Itiat-Ukot-Ufok mbuqtidem
3. Didie ke nnyin ikeme ndibop ndori ke Itiat-Ukot-Ufok oro?
4. Nso oruk nkpo ubop ufok edu? Ewe ekeme ndita ikañ ewe mminyũ ikemeke?
5. Anie edidomo utom nnyin? Ini ewe?
6. Nso oruk utom ke Jesus edikpe utip?
7. Nso iditibe ye utom emi ekenamde ndinem owo esit?